



Republika e Kosovës – Republika Kosova
Paneli Zgjedhor për Ankesa dhe Parashtresa
Izborni Panel za Žalbe i Predstavke

Anr.177/2019

Paneli Zgjedhor për Ankesa dhe Parashtresa (PZAP), në panelin e përbërë nga gjyqtarët: Rustem Thaqi kryesues, Fejzullah Rexhepi dhe Zyhdi Haziri anëtarë, me pjesëmarrjen e zyrtarit të lartë ligjor Kudret Hasani, duke vendosur përkitazi me ankesën e Institutit Demokratik të Kosovës (KDI), me seli në Prishtinë, paraqitur kundër subjektit politik NISMA-AKR-PD, për shkak të vendosjes së posterit në hapësirë publike, për Zgjedhjet e Parakohshme për Kuvendin e Republikës së Kosovës, që do të mbahen më datë 06.10.2019 në seancën e panelit të mbajtur me datë 04.10.2019, mori këtë:

V E N D I M

- I. Pranohet** e bazuar ankesa A.nr.177/2019 e datës 01.10.2019, e paraqitur nga Instituti Demokratik i Kosovës (KDI) me seli në Prishtinë, subjektit politik NISMA-AKR-PD, për shkak të shkeljes së Kodit të Mirësjelljes për Subjektet Politike - vendosja e posterave, për fushatën zgjedhore në rrugë publike - në Sheshin “ Mehë Uka” në Komunën e Mitrovicës, i Shqiptohet gjobë në lartësi prej 5,400.00 (pesë mijë katërqind) euro, dhe Detyrohet ta paguaj në afat prej 15 dite, nga dita e pranimit të këtij vendimi, nën kërcënim të përmbarimit.
- II. Urdhërohet** subjekti politik NISMA-AKR-PD, që brenda afatit prej 24 orëve, nga pranimi i këtij vendimi, ta përmirësoj shkeljen e përcaktuar, si në pikën I, të dispozitivit të këtij vendimi, në të kundërtën mund të sanksionohet me dënim shtesë nga PZAP-i.

A r s y e t i m

PZAP-i, ka pranuar një ankesë me datë 01.10.2019, nga Instituti Demokratik i Kosovës (KDI), me të cilën pretendon se gjatë monitorimit të fushatës zgjedhore për zgjedhjet e përgjithshme në vend ka vërejtur një parregullsi të cilën e ka evidentuar me fotografi të printuara. Paraqitësi i ankesës potencon se me datën 01.10.2019, në Sheshin “ Mehë Uka” në Komunën e Mitrovicës, monitoruesi i tyre ka hasur në poster të kandidatës për deputete nga Koalicioni NISMA-AKR-PD, të vendosur në hapësirë publike. Me këtë rast paraqitësi i ankesës thekson se Koalicioni NISMA-AKR-PD, ka bërë shkelje të nenit 33 paragrafi I pika b) i LZP-së. Në mbështetje të pretendimeve ankimore ka bashkangjitur një fotografi nga vendi ku ka ndodhur shkelja e pretenduar.

Në përgjigje në ankesë të datës 01.10.2019, Koalicioni NISMA-AKR-PD, konsideron se shkelja nuk është në kundërshtim me LZP, pasi që vendosja është bërë me marrëveshje me Komunën e Mitrovicës, ku me datën 01.10.2019, Drejtoria për Planifikim dhe Urbanizëm në

Mitrovicë ka lëshuar Pëlqimin e përkohshëm me Nr. 08/463-06-0089310/19 për vendosjen e bilbordit reklamues në Sheshin Mehe Uka, për promovim e kandidateve.

Përgjigjes në ankesë ia ka bashkangjitur pëlqimin e lëshuar nga Komuna e Mitrovicës për shfrytëzimin e hapësirës publike në Sheshin “ Mehe Uka”.

Paneli, pasi që shqyrtoj ankesën shkresat tjera të lëndës, vlerësoi se:

Ankesa është e bazuar

Paneli nga fotot e ofruara si provë nga parashtruesi i ankesës, të cilat gjendet në shkresat e lëndës, në mënyrë të padyshimtë, ka konstatuar se materiale zgjedhore-posterat e Koalicioni NISMA-AKR-PD, janë të vendosura në hapësirat publike-Sheshi “Mehë Uka “ në Komunën e Mitrovicës, veprim ky që është në kundërshtim me nenin 33 pika b) e LZP-së, e cila përcakton “ *Vendosja e njoftimeve, pllakateve dhe postereve, ose përndryshe, vendosja e emrave të tyre ose e sloganeve në lidhje me fushatën zgjedhore brenda ose jashtë ndërtesave publike ose godinave, në apo mbi rrugë publike, në shenjat publike të trafikut, brenda ose jashtë hapësirave ose ndërtesave të zëna ose, ndryshe, që shfrytëzohen nga organizatat ndërkombëtare, ose brenda ose në hapësirat private pa lejen e pronarëve ose shfrytëzuesve*”..

Paneli, vendimin e tij e ka mbështet në dëshmi të qarta dhe bindëse siç përcaktohet me nenin 117 par. 3 të LZP-së, prandaj pretendimet në përgjigje në ankesë nuk u cilësuan me ndikim në meritat e lëndës.

Parashtrimet në përgjigje në ankesë, se veprimet e Koalicioni NISMA-AKR-PD, nuk mund të sanksionohen si shkelje të LZP-së, për arsye se vendosja e materialeve zgjedhore-posterave në shesh dhe shfrytëzimin e hapësirës publike, është bërë me Pëlqim të Përkohshëm nga Drejtoria për Planifikimin dhe Urbanizëm e Komunës së Mitrovicës, Paneli pretendimet e tilla i vlerësoj si të pa bazuara dhe si të tilla i refuzoj pasi që, me këto prova nuk justifikon veprimet që janë të ndaluara dhe në kundërshtim me dispozitat ligjore të Nenit 33 pika b) i LZP-së, si dhe neni 5 paragrafi 1 pika d) e Rregullës 13/2013, ku parashihet se subjektet e certifikuar politike aktivitetet e tyre zgjedhore duhet t’i bëjnë në pajtueshmëri me Rregullat zgjedhore të Komisionit Qendror Zgjedhor (KQZ). Ky përfundim ka të bëjë me faktin se Kodi i Mirësjelljes i detyron të gjitha subjektet politike, kandidatët, anëtarët e subjekteve dhe mbështetësit e tyre që ta respektojnë këtë kod me qëllim të krijimit të kushteve që gjatë periudhës së fushatës, veprimet e subjekteve politik të jenë në një atmosferë të tolerancës demokratike, paqes dhe respektit për sundimin e ligjit.

Paneli me rastin e vendosjes se gjobës si në dispozitiv të këtij vendimi, ka marrë parasysh të gjitha rrethanat si në vijim: natyrën e shkeljes dhe ndikimit të mundshëm të saj në procesin zgjedhor në fjalët, shkallën dhe peshën e shkeljes, pjesëmarrjen e subjekti politik në zgjedhjet e mëparshme që konsiston në faktin së Koalicioni NISMA-AKR-PD, ka qenë e njoftuar me obligimet dhe përgjegjësit gjatë procesit të fushatës, shkeljet e Ligjeve zgjedhore në fuqi që ka bërë subjekti në fjalë në këto zgjedhje dhe në zgjedhjet e mëparshme në Kosovë, që do të thotë se i njëjti është i njoftuar me Rregullat zgjedhore si dhe shumën e fondeve që ka marrë subjekti politik prej Buxhetit të Republikës së Kosovës, për zhvillimin e aktiviteteve lidhur me fushatën zgjedhore. Po ashtu si rrethanë Paneli, mori edhe faktin që këtij subjekti, ia dha mundësinë për tu përgjigjur ashtu që në përgjigjet e tij ka mohuar shkeljet e supozuara, me

arsyetim se vendosja e postereve është bërë në bazë të pëlqimit e dhënë nga Komuna e Mitrovices Jugore. Paneli këto pretendime nuk i cilësoi si të bazuara në ligj dhe si arsye për lirim nga përgjegjësia e subjektit politik në fjalë, pasi që i njëjti ka pas obligim ligjor që të ndërmer masa përmirësuese. Mos ndërmarrja e masave përmirësuese ka ndikuar në lartësinë e gjobës së shqiptuar si në dispozitiv të këtij vendimi.

Paneli konform nenit 120.1 pika a) të LZP-së urdhëroi Koalicioni NISMA-AKR-PD që të marrë masa dhe të përmirësoj shkeljet në afatin prej 24 orëve dhe nëse Koalicioni NISMA-AKR-PD, nuk vepron sipas urdhrit të panelit do të sanksionohet me dënim shtesë nga PZAP-i, në pajtim me nenin 120.2 të LZP-së.

Paneli në kuptim të nenit 120.1, pika c), dhe nenit 118.1, të LZP-së, vendosi si në dispozitiv të këtij vendimi.

Paneli Zgjedhor për Ankesa dhe Parashtresa

Anr. 177/2019 më datën 04.10.2019

Kryesues i Panelit

Rrustem Thaqi



***Këshilla Juridike:** Kundër këtij vendimi është e lejuar ankesa sipas nenit 118 par. 4 të LZP-së, në Gjykatën Supreme të Kosovës, brenda njëzetekatër (24) orëve nga momenti i marrjes-pranimi të këtij vendimi.*